

## সাল ২০২৩: অপরাধের ক্ষেত্রে যা ঘটতে পারে

ড. খুরশিদ আলম\*

২০২৩ সালে বাংলাদেশে যে সব অপরাধ ঘটতে পারে তা নিয়ে এখানে আলোচনা করা হল। এটি নির্ধারণ করার ক্ষেত্রে সংখ্যাগত নয় বরং সমাজতাত্ত্বিক পদ্ধতি ব্যবহার করা হয়েছে। এর জন্য প্রধানত সামাজিক টানা-পোড়েন, দ্বন্দ্ব এবং অস্থিরতার মতো তিনটি প্রধান নির্ণায়ক বিবেচনায় নেয়া হয়েছে। সাথে সাথে আসন্ন জাতীয় এবং স্থানীয় নির্বাচনের বিষয়কে বিবেচনায় নেয়া হয়েছে। এ ছাড়া দেশের অপরাধ জগতের ওপর আন্তর্জাতিক ঘটনা প্রবাহের প্রভাবও বিবেচনায় নেয়া হয়েছে।

২০২৩ সালে যে সব অপরাধ হতে পারে তন্মধ্যে রয়েছে হত্যা, ধর্ষণ, অপহরণ, গুম, সন্ত্রাস, দাঙ্গা, জঙ্গীবাদ, লুটতরাজ, দস্যুতা ও চাঁদাবাজি, নারী এবং শিশু নির্যাতন, মানব-পাচার, আত্মহত্যা, দুর্নীতি ও অর্থপাচার, চোরচালান ও মাদক পাচার, চুরি ও ছিনতাই, সাইবার অপরাধ, উৎসব কেন্দ্রীক অপরাধ, ঋতুভিত্তিক অপরাধ, ব্যাংকের অর্থ লোপাট, খেলাপীঋণ, ক্ষমতার অপব্যবহার, প্রভৃতি।

**হত্যা:** বিগত বছরের ন্যায় এই বছরটিতে হত্যার হার থাকবে স্বাভাবিক। গত বছরের তুলনায় তা অতি সামান্য বৃদ্ধি পেতে পারে। ব্যক্তিতে ব্যক্তিতে দ্বন্দ্বের কারণে হত্যা স্বাভাবিক থাকলেও রাজনৈতিক টানা-পোড়েন কিছুটা বৃদ্ধি পেতে পারে। তবে দু-একটি অপরাধ ওয়েভ হতে পারে। জঙ্গী আক্রমণের চেষ্টা অব্যাহত থাকবে। হটস্পট কেন্দ্রিক কিছুটা সংঘাত ও টানা-পোড়েনের কারণে দু'একটি ক্ষেত্রে আইন-শৃঙ্খলা বাহিনীর সদস্যরাও আক্রান্ত হতে পারেন। তাছাড়া বিভিন্ন স্থানে রাজনৈতিক কারণে প্রতিযোগী পক্ষের লোকেরা আক্রান্ত হতে পারেন। তবে দেশব্যাপী বড় ধরনের সহিংসতা ঘটানোর সম্ভাবনা কম। সারা বছর কোনো না কোনো সামাজিক অস্থিরতা চলতে পারে। ক্ষুদ্র নৃগোষ্ঠী ও সম্প্রদায়ের উপর ক্ষুদ্র ক্ষুদ্র আক্রমণ হতে পারে। এ বছরও সরকারি দলের লোকেরা বেশি সহিংসতার শিকার হতে পারেন।

সরকারি দলের মধ্যে টানা-পোড়েন বাড়তে পারে এবং তা থেকে হত্যার মতো কিছু অপরাধ ঘটতে পারে। প্রতি বছরের মতো এ বছরও নারী এবং শিশু হত্যা অব্যাহত থাকবে এবং তা কিছুটা বৃদ্ধি পাওয়ার সম্ভাবনা রয়েছে। পারিবারিক পর্যায়ে টানা-পোড়েন ও মাদকের কারণে সহিংসতা বাড়তে পারে।

**ধর্ষণ:** এ বছরটিতে ধর্ষণ সামান্য বাড়তে পারে। তবে সামাজিক সচেতনতা বৃদ্ধির কারণে তা খুবই সামান্য বাড়তে পারে। ধর্ষণ পরবর্তী হত্যা কমতে পারে। সংঘবদ্ধ ধর্ষণ কিছুটা বাড়তে পারে। অপহরণ ও গুমের ঝুঁকি তেমন কমবে না।

**ক্রস-ফায়ার:** ক্রস-ফায়ার এ বছর তেমন থাকবে না। সম্প্রতি মার্কিনীদের দেয়া কিছু ব্যক্তির ওপর নিষেধাজ্ঞা ক্রসফায়ারের মতো ঘটনাকে প্রায় শূন্যে নিয়ে আসতে পারে। কেবল দু'একটি ঘটনা ঘটতে পারে। আইনশৃঙ্খলা বাহিনী এ বিষয়ে আরো বেশি সতর্ক হয়ে এগুতে পারে।

**জঙ্গীবাদী তৎপরতা:** জঙ্গীবাদীরা কোনঠাসা হলেও একেবারে নির্মূল হয়নি। বর্তমান বছরটিতে জঙ্গীবাদীদের তৎপরতা চালানোর প্রচেষ্টা অব্যাহত থাকবে বিশেষ করে তাদের ক্ষুদ্র ক্ষুদ্র প্রয়াস অব্যাহত থাকবে। সারা বছর তাদের কাছ থেকে অস্ত্র ও বিস্ফোরক উদ্ধার অব্যাহত থাকবে। দু'একটি আক্রমণ হওয়ার সম্ভাবনাও রয়েছে। কিছু জঙ্গী এ বছর রাজনৈতিক কারণে তৎপর হওয়ার সম্ভাবনা রয়েছে।

**সন্ত্রাস ও দাঙ্গা:** সংঘবদ্ধ সন্ত্রাস অব্যাহত থাকবে তবে তা বিভিন্ন পকেট এলাকায় বেশি হতে পারে। দাঙ্গা সৃষ্টির চেষ্টা থাকবে, তবে তা ক্ষণস্থায়ী হতে পারে। গ্রামে গ্রামে বা বিভিন্ন সম্প্রদায়ের মধ্যে তা হতে পারে। কোনো বিশেষ গোষ্ঠীর সাথে সংঘাতের বিশেষ কিছু ঘটনা ঘটতে পারে বিশেষ করে রোহিঙ্গাদের সাথে স্থানীয় জনগণের সংঘাত এবং টানা-পোড়েন অব্যাহত থাকতে পারে। রোহিঙ্গাদের মধ্যে হত্যা, ধর্ষণ, নির্যাতন এবং সন্ত্রাসী কর্মকাণ্ড অব্যাহত থাকবে।

পাহাড়ি এলাকায় সন্ত্রাস কিছুটা বাড়তে পারে। বিবাদমান দলগুলোর মধ্যে সংঘাত, হানাহানি অব্যাহত থাকবে। কিশোর গ্যাং-এর অপরাধ কিছুটা কমতে পারে। এ বিষয়ে আগের চেয়ে নজরদারী বৃদ্ধি করা হয়েছে।

**লুটতরাজ, দস্যুতা ও চাঁদাবাজি:** লুটতরাজ, দস্যুতা (জল, বন, চর ও হাওড়) ও চাঁদাবাজি কিছুটা বাড়তে পারে। তবে যে সব চাঁদাবাজি সারা বছর চলে তা অব্যাহত থাকবে।

**নারী এবং শিশু নির্যাতন:** এ বছরটিতে নারী ও শিশু নির্যাতন তেমন কমার সম্ভাবনা থাকবে না বরং রাজনৈতিক কারণে নারী এবং শিশু নির্যাতন কিছুটা বাড়তে পারে।

**মানব পাচার:** নারী-পুরুষ এবং শিশু পাচার অব্যাহত থাকবে। রোহিঙ্গা নারী ও শিশুপাচারের চেষ্টা অব্যাহত থাকবে।

**আত্মহত্যা:** সমাজে টানা-পোড়েন বৃদ্ধি অব্যাহত থাকার কারণে নারী ও পুরুষের মধ্যে আত্মহত্যার প্রবণতা বৃদ্ধি পাবে। পরীক্ষায় কাঙ্ক্ষিত ফলাফলে ব্যর্থতা, চাকুরি লাভে অসফলতা, প্রেমে ব্যর্থতা, নারীর প্রতারিত হওয়া ইত্যাদির কারণে তা বাড়তে পারে।

**দুর্নীতি, অর্থ-আত্মসাৎ ও অর্থপাচার:** এয়ারপোর্ট, পাসপোর্ট, ভূমি অফিস, বিআরটিএসহ বিভিন্ন স্থানে দুর্নীতি কিছুটা কমবে। বর্তমান বছরটিতে দুর্নীতি অতি সামান্য কমতে পারে। সরকারি কর্মকর্তাদের মধ্যেও সরকারি টাকা আত্মসাৎের প্রবণতা অব্যাহত থাকবে, তবে তা অতি সামান্য কমতে পারে। অর্থপাচার অব্যাহত থাকবে, তবে তা সামান্য কমতে পারে। দুর্নীতিবাজদের শতকরা হার সামান্য কমলেও দুর্নীতির পরিমাণ বাড়তে পারে। সরকারি প্রতিষ্ঠানে অনলাইন সুবিধা থাকায় ঘুষ-দুর্নীতি কিছুটা কমবে।

**চোরাচালান ও মাদক পাচার:** বর্তমান বছরটিতে স্বর্ণ চোরাচালান ও মাদক পাচার অতি সামান্য কমতে পারে। তবে নতুন নতুন মাদক দেশে ঢুকতে থাকবে। মাদক পাচারে রোহিঙ্গাদের অংশগ্রহণ কিছুটা কমতে পারে।

**চুরি ও ছিনতাই:** চুরি বর্তমান বছরটিতে কিছুটা কমবে বিশেষ করে যেসব স্থান সিসি ক্যামরার আওতায় আনা হয়েছে সেখানে বেশ কিছু কমবে। আর ছিনতাই কিছুটা কমতে পারে, সাময়িকভাবে কিছু কিছু জায়গায় কিছুটা বৃদ্ধি পাবে। এভাবে সারা বছর তা ওঠা-নামা করবে।

**সাইবার অপরাধ:** এ বছর সাইবার অপরাধ তেমন কমবেনা, তবে অপরাধ ঘটায় ক্ষেত্রে নতুন নতুন পদ্ধতি আবিষ্কার ও ব্যবহার অব্যাহত থাকবে। ডিজিটাল মার্কেটিং-এর মাধ্যমে তা অব্যাহত থাকবে।

**উৎসব কেন্দ্রীক অপরাধ:** বাংলা নববর্ষ, ইংরেজী নববর্ষ, রমজান, ঈদ, দুর্গাপূজা, ইত্যাদিকে কেন্দ্র করে চাঁদাবাজী, ছিনতাই, অজ্ঞান করা, অপহরণ, ধর্ষণ, জালনোট ব্যবহার, সাইবার প্রতারণা, বিভিন্ন পরিচয়ে প্রতারণা ইত্যাদি অপরাধ সীমিত থাকতে পারে। বছরের শেষ দিকে আক্রমণের পরিমাণ বাড়ার সাথে সাথে এসব অপরাধ আবার কিছুটা বাড়তে পারে।

**খেলাপী ঋণ:** বিভিন্ন ধরনের অর্থ আত্মসাৎ প্রক্রিয়া ও ঋণ খেলাপির কার্যক্রম অব্যাহত থাকবে। বিভিন্ন গোষ্ঠী ব্যাংক থেকে ঋণ নিয়ে তা ফেরৎ না দেয়ার চেষ্টা অব্যাহত রাখবে। এ ব্যাপারে রাজনৈতিক ও প্রশাসনিক সহযোগিতার ঘাটতি তেমন থাকবেনা।

**ক্ষমতার অপব্যবহার:** চলতি বছরে এর প্রবণতা কিছুটা কমতে পারে। নিয়োগ বাণিজ্যও বৃদ্ধি পেতে পারে। ঠিকাদারী কেন্দ্রিক দুর্নীতি কিছুটা কমতে পারে। **মনোনয়ন বাণিজ্য:** স্থানীয় সরকার নির্বাচনকে কেন্দ্র করে সামান্য মনোনয়ন ও সমর্থন বাণিজ্য হতে পারে।

**পরিবেশগত অপরাধ:** পরিবেশগত অপরাধের মধ্য দিয়ে জলবায়ু পরিবর্তন আরও ত্বরান্বিত হচ্ছে। অবৈধভাবে গাছ কাটার মাধ্যমে বনের ধ্বংস সাধন এর মধ্যে সবচেয়ে উল্লেখযোগ্য। দেশের খরস্রোতা নদ-নদীগুলো এখন দখল-দূষণে বিপন্ন। বেশির ভাগ নদ-নদীর অবৈধ দখল ও দূষণ অব্যাহত থাকবে। মানুষ এগুলো দখল করে শহর অঞ্চলে স্থাপনা নির্মাণ অব্যাহত রাখবে। ইটভাটাগুলোতে অবাধে জ্বালানি কাঠ পোড়ানো এবং গাছপালা উজাড় করা অব্যাহত থাকবে। অবৈধভাবে ইটভাটায় ব্যবহার করা আবাদি জমির উপরিভাগ, নদীর তীর এবং পাহাড়ের মাটি ব্যবহার অব্যাহত থাকবে। আবার অবৈধ ইট ভাটার পরিমাণও এই বছর বাড়তে পারে। সরকার প্লাস্টিকের ব্যবহার কমানোর ক্ষেত্রে নানা উদ্যোগ নেয়ার ফলে তার ব্যবহার কিছুটা কমবে। ক্রমবর্ধমান জীবিকার চাহিদার কারণে প্রকৃতি বিধ্বংসী কর্মকাণ্ডের ফলে দেশে হাতি, বাঘসহ অন্যান্য বন্যপ্রাণীর আবাসস্থল ধ্বংস অব্যাহত থাকবে। আর জলবায়ু পরিবর্তনের ফলে তৈরি হচ্ছে নেতিবাচক অর্থনৈতিক ও সামাজিক অস্থিরতা, যা পরিবেশের ওপর বাড়তি চাপ তৈরি করবে।

=====

\*চেয়ারম্যান, বাংলাদেশ ইনস্টিটিউট অব সোশ্যাল রিসার্চ (বিআইএসআর) ট্রাস্ট। আন্তর্জাতিক খ্যাতিসম্পন্ন সমাজবিজ্ঞানী ও অপরাধবিজ্ঞানী; বিশিষ্ট তাত্ত্বিক ও উন্নয়ন মডেল প্রণেতা; জাতীয় পরিকল্পনা প্রণয়নকারী ও নীতিমালা প্রস্তুতকারী।